

UMP - NIU jalin kerjasama akademik



Universiti Malaysia Pahang (UMP) memperkukuh jalinan hubungan strategik apabila memeterai Memorandum Persefahaman (MoU) dengan Northern Illinois University (NIU), Dekalb Illinois United States of America (USA) pada 22 November 2010 yang lalu.

MoU yang ditandatangani Naib Canselor, Profesor Dato' Dr. Daing Nasir Ibrahim dan Provos & Naib Presiden Eksekutif NIU, Raymond W. Alden III ini menyentuh pelbagai bentuk jaringan kerjasama khususnya dalam meneroka kepakaran menubuhkan program teknologi kejuruteraan.

Kerjasama lain yang dibincangkan ialah program pertukaran pelajar, sangkutan jangka pendek staf akademik, program berkembar dan program mobiliti pelajar.

Menurut Naib Canselor, UMP dapat memanfaatkan kerjasama dua hala ini dengan pengalaman NIU dalam menawarkan program teknologi kejuruteraan serta penerokaan bidang baharu termasuk *environmental studies*, *energy & sustainability* dan *nanosciences*.

Katanya, kerjasama ini juga dapat memantapkan program bersama NIU dalam bidang sains komputer dan teknologi di UMP.

Kerjasama ini selaras dengan aspirasi dan inisiatif kerajaan Malaysia dalam menghasilkan lebih ramai graduan Jurutera Praktikal atau Teknologis yang mampu memenuhi keperluan pasaran kerja pada masa kini dan hadapan.

Manakala, Raymond W. Alden turut menahirkan harapan yang tinggi agar kerjasama antara NIU dan UMP dikekalkan secara lebih strategik bagi memberi manfaat kepada kedua-dua pihak.

"Kedua-dua universiti harus menjadikan kerjasama yang dimeterai ini sebagai satu titik tolak dalam meningkatkan hubungan kerjasama antarabangsa dalam meningkatkan bidang sains dan teknologi," katanya.

Hadir menyertai delegasi Timbalan, Naib Canselor (Akademik & Antarabangsa), Profesor Dr. Badhrulhisham Abd. Aziz, Pengarah Pejabat Antarabangsa, Dr. Wan Norlidah Al-Qadri dan Penolong Pendaftar Kanan Pejabat Timbalan Naib Canselor (Akademik & Antarabangsa), Mohd. Raizalhilmy Mohd Rais.

Delegasi juga berpeluang melawat Kolej Kejuruteraan & Teknologi Kejuruteraan serta mengadakan beberapa siri perbincangan bersama pihak NIU untuk membentuk kerjasama jaringan strategik.

UMP jalin kerjasama dengan Universiti Sarajevo



Universiti Malaysia Pahang (UMP) menandatangani memorandum persefahaman (MoU) dengan Universiti Sarajevo dalam usaha menjalinkan kerjasama dalam bidang pembangunan akademik, penyelidikan dan pembangunan pada 20 Oktober 2010 yang lalu.

Menerusi MoU ini, UMP dan Universiti Sarajevo akan menumpukan terhadap kerjasama akademik termasuk pertukaran pelajar, staf akademik dan penempatan profesor pelawat di kedua-dua universiti.

Perjanjian ditandatangani oleh Naib Canselor UMP, Profesor Dato' Dr. Daing Nasir Ibrahim dan Universiti Sarajevo diwakili oleh Rektornya, Profesor Dr. Faruk Caklovica.

Menurut Profesor Dato' Dr. Daing Nasir, hubungan ini akan membolehkan universiti mewujudkan jalinan yang kukuh dan melengkap antara satu sama lain.

"Kerjasama ini juga meneliti keperluan pertukaran maklumat akademik dan kepakaran terutamanya dalam bidang teknologi dan kejuruteraan universiti masing-masing untuk dikongsi bersama," kata beliau.

Hadir sama Timbalan Rektor, Profesor Dr Slavenka Vobornik, Dekan Fakulti Kejuruteraan Mekanikal, Profesor Dr. Ejub Dzafefovic, Dekan Fakulti Kejuruteraan Elektrik & Elektronik, Profesor Dr. Kemo Sokolija, Dekan Fakulti Kejuruteraan Seni Bina, Profesor Dr Ahmed Hadrovic, Dekan Fakulti Kejuruteraan Awam, Profesor Dr. Mustafa Hrasnica dan Dekan Fakulti Pengangkutan & Komunikasi, Profesor Dr. Samir Causevic.

Turut hadir Ketua Kedutaan Malaysia di Bosnia, Khairul Nazran Abdul Rahman.

Sementara itu, delegasi yang disertai Timbalan Naib Canselor (Akademik & Antarabangsa), Profesor Dr. Badhrulhisham Abdul Aziz dan Timbalan Pendaftar Jabatan Pendaftar, Haryani Abdullah turut menyertai lawatan ke Universiti Dzemal Bijedic Mostar serta Universiti Tuzla di Bosnia dan Herzegovina.

Delegasi UMP berpeluang memberi penerangan mengenai program pengajian akademik dan dijangka bakal menjalinkan kerjasama dengan dua universiti ini tidak lama lagi.